

**Sampai masa kerajaan kaji undang-undang berkaitan dadah - Tun M
AstroAwani
18 Februari 2020
Wan Syamsul Amly,**

PUTRAJAYA: Tun Dr Mahathir Mohamad berkata, sudah sampai masa kerajaan menilai dan mengkaji semula semua undang-undang berkaitan pengedaran dan penyalahgunaan dadah mengikut kesesuaian perubahan trend dadah semasa.

Menurut Perdana Menteri, kajian itu termasuk hukuman mati mandatori yang dikatakan terlalu keras dan tidak membendung isu utama pengedaran dadah.

"Jadi banyak yang berpendapat bahawa ia tidak berkesan. Masih ada mereka yang mencari duit tidak halal dengan mengedar dadah.

"Kita akan mengkaji sama ada dakwaan ini betul atau tidak dan jika kita dapati ada cara lain dalam undang-undang yang boleh mencegah penyalahgunaan dadah atau pengedaran dadah, maka kita akan pinda undang-undang.

"Dalam masa sama, mereka yang menjadi penagih tidak dianggap sebagai penjenayah, tetapi penting kita semua faham menyalahgunakan dadah sesuatu yang tidak baik kepada diri, keluarga, masyarakat dan negara," katanya.

Beliau berkata demikian ketika berucap pada Pelancaran Bulan Antidadah Kebangsaan 2020, di sini pada Selasa.

Tema Bulan Antidadah Kebangsaan Ke- 37 tahun ini adalah 'Kemakmuran dan Kesejahteraan Bersama'.

Dalam pada itu, Dr Mahathir turut menyokong usaha menangani penyalahgunaan dadah termasuk saranan kepada sektor swasta agar menjadikannya sebahagian dari program tanggungjawab sosial korporat (CSR).

"Saya menyokong inisiatif KDN dan Agensi Antidadah untuk turut mengundang NGO dan komuniti tempatan di dalam usaha menangani masalah dadah ini.

"Sokongan Kementerian Kewangan melalui pelaksanaan Inisiatif Bersepadu Menangani Penyalahgunaan Dadah, Substan dan Pelencongan Sosial akan menjadi galakan kepada usaha tersebut," kata beliau lagi.

Sementara itu, Dr Mahathir memberitahu, Agensi Antidadah Kebangsaan (AADK) perlu menjadikan pendidikan pencegahan sebagai keutamaan bagi memastikan masyarakat mempunyai pengetahuan dan kesedaran yang tinggi untuk terlibat secara langsung dalam usaha-usaha pendidikan pencegahan yang komprehensif.

Tambahnya, langkah-langkah penguatkuasaan dan rawatan pemulihan dadah oleh pihak berkuasa pula perlu mengambil kira perubahan semasa yang berlaku supaya usaha-usaha menanganinya lebih tersusun dan berkesan.

"Pihak yang menawarkan perkhidmatan rawatan dan pemulihan dadah juga harus memahami keperluan pendekatan rawatan yang diberikan seperti yang disarankan oleh National Institute of Drug Abuse.

"Prinsip rawatan dan pemulihan dadah yang berkesan perlu difahami bahawa tiada rawatan tunggal yang sesuai untuk semua orang.

"Penyedia perkhidmatan rawatan dan pemulihan dadah, Ahli-ahli Lembaga Pelawat, Jawatankuasa Pemulihan Dadah Daerah dan termasuk mereka yang mengendalikan Pusat Pemulihan Dadah Persendirian perlu mengintegrasikan pendekatan rawatan dan pemulihan yang lebih menyeluruh dengan mengambil kira prinsip-prinsip rawatan pemulihan dadah yang berkesan," katanya.

Antara Januari sehingga Jun 2019, seramai 105,375 orang penyalah guna dan penagih dadah serta bahan telah direkodkan.

Ini adalah peningkatan sebanyak 23.2 peratus jika dibandingkan bagi tempoh yang sama dalam tahun 2018.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/sampai-masa-kerajaan-kaji-undang-undang-berkaitan-dadah-tun-m-231046>